

廣陵覽古卷三

江都顧鑾謝唵氏述

大銅山

在儀徵縣西北二十五里十道志云揚州有大銅山吳王  
濞鑄錢之所又有冶山亦其地也下有鑪鞴遺跡

宋鮑照過銅山掘黃精詩土肪闕中經水芝韜內策寶餌  
緩童年命藥駐衰歷矧蓄終古情重拾烟霧迹羊角栖斷  
雲榼口流隘石銅溪晝沈森乳竇夜涓滴旣類風門磴復  
象天井壁蹠蹠寒葉離濛濛秋水積松色隨野深月霧依

廣陵覽古卷三

一

城子山

在縣北六里狀如城岡阜靡迤二十餘里西迎大江北走  
天長宋兩京故道也魏文帝臨江觀兵築東巡臺於此

雞留山

在縣西名勝志云伍子胥旣得志欲報浣沙女而不知其  
處乃留雞於此以祀之謂浣沙女葬此山也

小山

在縣西北十五里方輿勝覽云宋大中祥符六年京師建

玉清昭應宮擇地範鑄司天言建安軍西小山有王氣堪以鑄象及成迎奉赴闕詔卽其地建天慶儀真觀

鑾按九朝通畧謂建安軍自此陞爲州於州起儀真觀後遂名眞州

### 橫山

在縣西三十五里與方丫二山相鼎峙元魏於此置橫山縣山之陽有禪證寺梁天監中建相傳昭明太子讀書堂也僧神堅以爲太子院後黃巢兵過以刃加神堅不能動膜拜而去

## 廣陵覽古卷三

### 二

### 新城鎮

在縣治東十里元至元中移揚子縣治此今爲鎮土人嘉植桃春花最盈

宋貢奎詩一雨淮南霽新城喜暫登江平流浩浩山遠路層層大舶連檣發高樓列檻凭北來殊覺久眼畏火雲蒸老鸛嘴

在城南宋德祐初元阿朮攻眞州州守苗再成與戰於老鸛嘴敗績卽此地

### 歐陽戍

在城東北十里宋大明三年詔沈慶之討竟陵王誕慶之進至歐陽齊延興元年蕭鸞使王廣之襲南兖州廣之至歐陽遣部將先驅入廣陵梁太清二年蕭正表叛附侯景景以爲南兖州刺史正表乃於歐陽立柵以斷援軍蕭會理遣兵襲破之卽此地

### 珠金沙

在縣東南十里珠金里元將張宏範以兵船掠珠金沙及宋將馮都統與兀朮戰處文天祥詩我作珠金沙上遊是也

## 廣陵覽古卷三

### 三

### 長風沙

在縣六都歐陽修集錢鏐傳載周世宗征淮南詔錢俶攻李璟師渡江俶乃益兵使邵可遷以舟師出瓜步至長風沙與周師會

### 白沙州

在城南卽白沙鎮齊建武初魏人南侵詔於白沙置一軍長蘆分置三軍唐至德二年永王璘作亂其將馮季康奔白沙降於李成式上元元年劉展據廣陵軍於白沙五代吳楊溥如白沙觀樓船改爲迎鑾鎮周顯德五年周主如

迎鑾鎮至江口屢破唐水軍

靈潮堰

在城南運河西與新河接大中祥符間鑄金像成將迎赴京時潮水已涸而忽溢舟遂及岸因得以濟故名

建安渡

在縣西南

鑾按宋史建隆元年淮南節度使李重進據揚州帝親征拔其城遂命諸軍習戰艦於鑾江口南唐臣杜著僞作商人同薛良由建安渡來獻平南策帝疾其不忠誅之

廣陵覽古卷三

四

煉丹井

在縣西故儀真觀壇上井深百尺俗呼煉丹井東序有石刻天篆蓋帝所賜許旌陽詔書古松一株立殿陞百年物也

慧日泉

在天寧寺宋蘇東坡嘗於寺寫經名其泉曰慧日

賦詩臺

在城子山一名東巡臺相傳魏主丕立馬賦詩於此

白沙亭

建始於唐宋建於江北岸嘉定間知州方信孺卽注目亭  
故址再建今皆不存

唐韋應物白沙亭逢吳叟歌龍池宮裏上皇時羅衫寶帶  
香風吹滿朝豪士今已盡却話舊遊人不知白沙亭上逢  
吾叟愛客脫衣且沽酒問之執戟亦先朝零落艱難却負  
樵親觀文物蒙雨露見我昔年侍丹霄冬狩春祠無一事  
歡遊洽讌多頒賜嘗陪夕月竹宮遊每返溫泉灞陵醉星  
歲再周十二辰爾來不語今爲君盛時急去良可恨一身  
坎壈何足云

廣陵覽古卷三

五

鑾鶴亭

在儀真觀

鑾按九朝通略宋大中祥符鑄金像時有青鸞白鶴景雲  
盤繞之異乃爲亭以祀之

拂雲亭

在東園內見歐陽修記今梓潼墩其故址也

宋洪興祖詩黃雲收盡綠針齊江北江南水拍堤野老攜  
扶相告語兒童今始識鋤犁

壯觀亭

在縣北三里北山之巔宋政和中郡守詹度建米芾書扁  
作壯觀亭賦及詩劉燾爲記紹興淳熙間廢而復建者再  
開禧後莽爲荒榛亭與石刻俱不可復識

宋米芾賦曰米元章登北山之宇徘徊四顧慨然而歎曰  
壯哉江山之觀也開闢復古逖矣邈矣帝德所被北幽南  
陟王功未宣六合阻異明翳視其消長來叛從而間起去  
古無章水濱莫委此世所悼晉裂漢髦披榛刈莽且代且  
盜豈地具而天設特資獯而附暴者乎乃物偶然而人乘  
以智巧爾若夫真符秉中萬派朝宗稽顙納質不黷兵鋒

廣陵覽古卷三

六

版圖入而地合氛祲擴其天同遠琛近賈千里不風鑑湛  
一色折葦可通其或弱吹砌鱗疾焱湧山九地出沒千峯  
上攢如嶺并亘連雲俱還長鯨齒巨天吳腹斑閨運未至  
生民道艱宜乎曹郎託詞以按甲怫鬱而永嘆也吾每登  
是宇覽是土當日杲天清嵐開練布邀太平君子引吳醇  
舞越女破千歲之長憂擲森然之萬古有杞初登由儀載  
旅至甚醉而去也

又詩云扶筇上瑤臺一笑領清絕如何夜來風獨下前村  
雪 邀賓壯觀不辭寒玉立風神氣上千欲識謝公清興

處千山萬嶺雪漫漫

鑑遠亭

舊在潮聞西宋米芾書扁江流齧岸而廢乾道初知州張  
郟建於水巷西淳熙末趙師龍更名曰注目建於城之西  
南慶元中吳淇又建於頰江樓前仍曰鑑遠

谿陰亭

在縣東范氏園

宋蘇軾詩白水滿時雙鷺下綠槐高處一蟬吟酒醒門外  
三竿日卧看谿南十畝陰

廣陵覽古卷三

七

天開圖畫亭

舊在西城上宋淳熙中郡守姚恪建蓋取黃魯直天開圖  
畫卽山川句爲名後因甃城亭廢以其名揭於頰江樓嘉  
定間知州吳機別建於朝宗門外江濱揭以舊額又創水  
竹喜涼漣漪聞凱轉幽五亭各繫七絕一首

宋吳機水竹亭詩一泓清水數竿竹消得詩人爲品題今  
我公餘無俗事不妨領客暫提携 喜涼亭詩小亭新築  
藕花邊爲愛陂塘五月天最好一番風雨過瓊枝無數落  
清泉 漣漪亭詩回環流水漾清波一葉扁舟逸興多寄

語遊人恣觀覽豐年相與樂中和 聞凱亭詩調發今年  
迥不同折衝果在笑談中若非制闔規模定安得兼全戰  
守功 轉幽亭詩從容得樂興無涯地轉清幽亦可佳須  
信居塵塵不染竹風飄拂爽人懷

### 鏡薌亭

元國信使郝經留儀徵所居之亭也

元郝經詩云薄薄輕雲似霧沉沉陰陰江氣冷侵人一庭芳  
草留連客兩樹夭桃斷送春檻外流鶯仍語巧梁間旋燕  
又巢新東城欲伴西湖柳寒食中間入夢頻

### 廣陵覽古卷三

八

鑾按元中統元年郝經奉使告登位於宋居此

### 讀書堂

見前橫山

### 快哉堂

在子城東宋慶元中州牧吳洪經始後牧張頴成之取宋  
玉蘭臺賦風之語宋陳造有記

### 張南史宅

南史字季直唐大歷間寓居儀徵今莫可考  
唐郎士元贈張南史詩雨餘深巷靜獨酌送殘春車馬雖

嫌僻鶯花不棄貧蟲聲黏戶網鼠跡印牀塵借問山陽會  
如今有幾人

### 孫學士宅

名錫江都人隨父遷家眞州宅內有歸來亭

宋王安石歸來亭詩彭澤陶潛歸去來素風千歲出塵埃  
明時儁老心無累故里高門子有才更作園林負城郭常  
留花月映樓臺却尋五柳先生傳柴水區區但可哀

### 呂滎公寓宅

東萊詩話云崇寧末東萊公迎侍滎陽公居眞州船場晁

## 廣陵覽古卷三

## 九

以道赴官明州來訪公留連數日而去別後以詩寄公

鑾

按東萊公者滎公子好問非伯恭也

### 東園

宋皇祐四年施昌言許元爲發運使馬遵繼爲判官因眞  
州廢營地爲之歐陽修記蔡襄書人謂園與記書爲三絕  
久圯廢無考

宋蘇軾詩並序館寓東園一日睡起米元章冒熱到園急  
送麥冬飲因賦此詩一枕清風值萬錢無人肯買北窓眠  
開心暖味門冬飲知是東坡手自煎 黃庭堅病起游東

園詩主人心安樂花竹有和氣時從物外賞自益酒中味  
鬪枯蟻改穴掃籜竹迸地萬籟寂中生乃知風雨至

鑾

按舊志云在漕臺東翼城內是爲今之東門內也明隆  
慶初知縣申嘉瑞建東園書院在今資福寺東萬歷中歐  
陽照欲復東園得小教場地建屋三楹石刻東園二字於  
壁今亦久廢

國朝吳氏築園於學宮之東亦曰眞州東園一仿歐公記爲  
之而實非東園舊址也

新園

廣陵覽古卷三

十

宋職方朱廷臣築今失其址

宋梅堯臣詩青蔥江上樹杳靄宮前道道側有新園園中  
無惡草松壠方在望茅屋聞已考朝廷正急才何得言歸  
老

梅園

在縣西十五里內有古意亭宋嘉定間州牧吳機建

宋方信孺詩十里低平路千株雪作堆不須驅小隊祇伴  
一筇來

崇因永慶寺

在北山上宋靖康初丞相吳敏請爲功德院後徙於城內  
元大德間復徙還故址亦稱北山寺後有池深莫測相傳  
爲龍湫西南有白蓮泡花開時香遍北郊人謂之香國俱  
久淤廢

宋王令北山寺詩上人合動山間興吾恨衰遲學謝安約  
屐操筇那有限吹雲落雨謾無端先憑報信春枝動預想  
分題雪屋寒林下不諳人世苦笑將霜髻與君看

### 儀真觀

解見前小山並鸞鶴亭

## 廣陵覽古卷三

### 十一

宋張舜民留題儀真觀詩聞說仙鄉接瀨鄉閑遊詩侶禮  
虛皇三朝寶派通前浦萬葉靈杉蔽蜀岡天地杳冥供寫  
像江山回合助靈祥五雲送入蓬萊島留與人間作道場

鑾

按陸游入蜀記云初問儀徵觀在城南里許方怪與國  
史異及歸徃游則信城南也有老道士年七十餘出迎自  
言能述儀真本末云舊觀在城西北小山之麓祥符所鑄  
乃金銅像每座高三丈以黃麾全仗道門幢節迎赴京師  
皆與國史合故當時樂章曰范金肖像申嚴奉宮館狀翬  
飛萬靈拱衛瑞烟披堤柳映黃麓又言賜號瑞應福地則

史所不載也今所謂儀真觀者昔黃冠入城休憩道院耳  
按此觀在小山者與方輿勝覽九朝通略同而在城南里  
許者非

宋屯田員外柳耆卿墓

舊志云在儀徵縣西七里近胥浦橋

鑾

按王士徵詩云殘月曉風仙掌路何人爲弔柳屯田其  
所著分甘餘話亦云柳耆卿卒於京口王和甫葬之今儀  
徵西地名仙人掌有柳墓則是葬於真州非潤州也然仙  
人掌在郡城西十里儀徵四郊無此名不知王何所據也

以上儀徵縣

神居山

在高郵州西六十里新安村高二十五丈周十五里

宋陳造次韻楊宰遊神居山詩峯頂留雲一鷲騫山腰涵  
碧老蛟蟠鯤鵬翻海十洲近江漢分流三楚寬曾得乘閒  
上埃靄小留舒嘯倚高寒想君緩憩雙鳧鳥不羨冲霄吳  
彩鸞

鑾

按輿地廣記云謝安曾煉丹於此又云南齊亘公嘗結  
庵此山煉丹種藥歲久仙去方輿紀勝云山有排牙石人

欲數之自始至終其數必增自終而始其數愈甚竟無能知其數之的者南兖州記云山頂有石井石臼井大可五尺深倍之一名石塘水清冽大旱不竭舊志云山頂有爽氣每遇二八月間則見見時望五十里外如鏡行人鬚眉城中西墘磚縫皆可睹

### 三塚鎮

在城東四十里宋建炎中金人攻楚州詔通泰鎮撫岳飛援之飛屯軍三塚鎮爲楚州聲援及敵至三戰三捷卽在此

### 北阿鎮

在城西北八十里亦曰三阿東晉嘗僑置幽州於此太元四年苻秦將俱難彭超圍幽州刺史於三阿去廣陵百里謝元自廣陵馳救難超戰敗退保盱眙卽在此宋陳造次宿北阿詩聞道籃輿去遙岡復近阿詩應弔孝逸碑或贊頭陀靜者官餽口公朝禮作羅憐君日阡陌塵土撲陰何

鑾

按元和郡縣補志高郵縣有下阿溪引通鑑光宅元年九月徐敬業聞李孝逸將自潤州回軍拒之屯高郵之下

阿溪今陳詩有詩應弔考逸之句是北阿卽下阿溪也  
界首鎮

在城北六十里與寶應分界

元薩都刺過界首驛詩清氣撲人湖面水幽聲到耳樹頭  
風人家蠶老櫻桃熟恰是淮南四月中 平湖過雨天開  
鏡落日放船人打魚野老柳陰沽黍酒行人馬上得家書  
嵇莊

在城東南十五里宋末嵇聳保聚於此鄉人從義不肯背  
宋也

廣陵覽古卷三

十四

宋文天祥詩小泊嵇莊月正弦莊官驚問是何船今朝哨  
馬灣頭出正在青山大路邊

丁村

在城南卽丁志村宋德祐二年揚州圍久食盡州將姜才  
聞高郵運米將至出步騎與元軍戰於丁村潰還卽此

新開湖

在州西北三里東南通運河凡天長縣以東諸水滙此而  
達於淮湖長濶一百五十餘里晴霽則水光澄澈或風雨  
則洪濤洶湧多損舟楫

宋揚萬里過新開湖詩遠遠人烟點樹梢船門一望一魂  
消數行野鴨數聲雁來爲湖天破寂寥

### 甓社湖

在州西三十里宋孫莘老家湖陰夜讀書覺窗明如晝循  
湖求之見大珠其光燭天是年莘老登科王觀揚州賦云  
馳甓社之湖兮夜駭乎明珠之光怪卽指此

宋黃廷堅呈孫莘老詩甓社湖中有明月淮南草木借光  
輝故應剖蚌登王府不若行沙弄夕暉 楊萬里詩爲愛

湖中似掌平忽逢巨浸却心驚怪來萬頃不生浪凍合五

### 廣陵覽古卷三

### 十五

湖都是冰碧玉湖寬容我到白銀地滑没人行茲遊只道  
清無價清殺詩人老不勝

### 平阿湖

在州西八十里通天長縣桐城河

元薩天錫詩秋風吹白波秋雨敗鳴荷平湖三十里過客  
感秋多 雨濕鼓聲重風勻湖面平官船南北去帆影掛  
新晴

### 五湖

在州西六十里平阿東村通桐城河

宋黃魯直詩九陌黃塵烏帽底五湖春水白鷗前扁舟不爲鱸魚去收取聲名四十年

### 玉女井

在州西南迎仙橋東邾公與女鍊丹處宋蔣之奇詩邾家女子已仙去尙有故井存通衢卽指此

### 淮春樓

名勝志云州西北城樓也宋郡守趙不慚建

宋陳造淮春樓落成詩步帳高牙置下方華筵雲影入風裳西山爽氣珠簾外北海芳罇錦瑟旁賓主前聞無勝事

## 廣陵覽古卷三

## 十六

簪鈿明日賸餘香一天和氣誰拘檢付與邦人作醉鄉

### 文遊臺

在城東二里宋淳熙初王訥起其廢嘉泰三年吳鑄重新之開禧中復圯慶元戊午州牧張革重建應武爲記

鑾

按輿地紀勝云宋蘇軾昔過是邦與孫覺王鞏秦觀會

集於臺上州牧名其臺曰文遊以紀其盛李伯時作文遊

臺圖刻之石

### 釣魚臺

名勝志云甓社湖西有釣魚臺舊傳宋熙寧中有道人於

湖濱築臺朝夕垂釣自言有二大魚自西來潛入此水當  
爲釣之以免生民害

華胥臺

在州治東衆樂園後

宋楊蟠詩歌舞飄飄百尺臺半天龍麝散香煤初愁翠袖  
凌風去却駭飛綃下月來雲杪一聲聞玉笛露華千點落  
金杯我緣衆樂狂方盛園鎖從教日日開

雲峰臺

在州城西

廣陵覽古卷三

十七

元成廷珪詩雲峰臺上今宵月奇絕平生在此行天水光  
搖秋萬頃星河涼轉夜三更謫仙被酒騎鯨去遊女吹簫  
學鳳鳴明發星槎上河漢定傳詩話到蓮瀛

神遊臺

在州境里址未詳

元周北山神遊臺詩淮南古奇勝瀾漫雲水麗郵城枕其  
中喧喧擁闐闐壯覽城之臯飛臺翼雲際灩灩白銀盆沉  
沉水晶界玩心神明表引興天地外把酒一憑欄天風落  
襟袂懷哉淮海翁落日爲三醉

天壁亭

在新城多寶橋西宋時建秦觀詩有云粘天四無壁因以天壁名亭

玩珠亭

在樊良鎮沈存中筆談云甓社湖有一珠甚大初微開其房光自吻中出如橫一金線俄頃忽張殼其大如半席珠大如拳白光似銀爛然不可正視十餘里間林木皆有影如初日所照行舟至此往往維數宿以待因起玩珠亭於岸邊

廣陵覽古卷三

十八

九里亭

在北門外九里

宋楊萬里過九里亭詩水渚纔容足漁家便架椽屋根些子地簷外不勝天岸岸皆垂柳門門一釣船五湖好風月乞與不論錢

高沙館

在州西南州號高沙因以名館卽信國監司之行衙也  
宋文天祥曉發高沙館詩曉發高沙卧一航輕烟漠漠水茫茫舟人指點荒村外南北今年幾戰場

瞻袞堂

在北城上宋紹興四年都督丞相張浚撫臨侯衛次於淮東時人因以瞻袞名堂

豐瑞堂

宋郡守王訥建

宋楊蟠詩吏隱孟城九十旬豐年日日是佳辰五千芍藥齊教放何處揚州更覓春

鑾按輿地紀勝云堂以芍藥得名淳熙三年夏四月郡圃芍藥一枝五色時郡守王訥名其燕寢之堂爲豐瑞仍作

廣陵覽古卷三

十九

五花圖於上

秀野堂

州郡圃內舊有是堂宋慶元間州牧吳鑄修建

鑾按陳造秀野堂記略曰池荷動而鯈魚物木蔭濃而烏鳥樂北垣挺竹千箇微風披拂舞翠幢而嘯饑鳳儼乎坡仙所謂秀而野也

四達齋

方輿勝覽云高郵使君趙晦之作齋東圃戶牖四達因以名之

眉山蘇軾爲之銘曰有藏於中必謀於外惟慢與謹皆盜之誨孰知此間空洞無物戶牖開闔廣焉四達擊去盜易使無盜難我無可攘以守則全趙侯無心得法赤溪四出其齋以達民迷

### 衆樂園

在州治東一名東園宋朝會要云元祐元年詔復州爲軍賜帑金葺軍治兼修衆樂園經始於州牧毛漸落成於後牧楊蟠蟠於園內起堂臺亭閣一二所自爲記並繫以詩郡圃

## 廣陵覽古卷三

## 二十

卽衆樂園明一統志云內有夢草亭宋人詩云今日池塘見春草永嘉精魄獨依然

### 齊亘公廟

在神居山舊傳南齊時有亘姓者菴於此山煉丹種藥昇仙而去後人立廟祀之

### 樊良廟

在州北樊良溪邊俗傳爲樊噲張良廟廟有二像一稱侯一稱真人其由來皆不可考

### 康澤侯廟

在州西北十里湖中洲上俗呼爲耿七公廟相傳侯姓耿名裕德東平人或云以女歸州之茆氏來遊或云卽茆氏甥死而棲神湖中屢顯靈異嘗夜懸燈於波濤洶湧間爲人拯溺捍患遇旱潦疫厲蟲蝗禱之立應宋哲宗時肇建立廟加封號焉明宣德中平江伯陳瑄奏請始入祀典

#### 四賢祠

在文遊臺上祀宋蘇軾孫覺秦觀王鞏又有四賢堂祀孫覺秦觀喬執中朱壽昌見舊府志

宋王磐四賢祠詩誰排閭闔借天風滿地塵埃一洗空萬

### 廣陵覽古卷三

### 二十一

卷文章光海嶽千年神爽積鴻濛蘭亭舊逸浮雲外甃祉濃春細雨中一瓣心香初奠罷倚闌呼酒送飛鴻

#### 紹興三鉅公祠

在州廡西祀宋張浚韓世忠岳飛宋寶慶初郡守戴桷創建

鑾按建炎時巡留蹕吳會淮左爲畿甸藩翰高郵爲淮右心膂審伸縮察虛實者必盡心於此故張忠獻越江督師憑高寄懷有鷹揚徐郚電掃雲朔之志則瞻袞堂其徙倚之地也韓忠武馘黠寇之酋殄僞劉之兵域土峙糧則郡

城其版築之遺也岳忠武親援丈矛靖忠報國土名三塚  
則其結寨之址也後戴桷守是邦爰於廡西築祠祀之並  
爲記

### 醴泉寺

在州舊城西南或云卽光孝寺寺有醴泉井故名宋秦觀  
有開堂疏

### 張墩寺

在塘下村宋大觀間建

宋王磐詩幾年傳偈到空門今日來叅老法髡流水五湖

## 廣陵覽古卷三

## 二十二

清入寺白雲千古結成墩欲將詩話咀禪味願借機鋒斷

俗根古衲向予輕一指潭中水月淡無痕

### 乾明教寺

在中市橋西宋淳熙間建

宋陳造遊乾明寺詩竹風清如水浣我塵埃顏老禪貧無  
錐小破蔬筍慳短轅下鷗夷共此半日閒住筆訊鶯燕把  
杯屬江山老夫病止飲苦語澁莫刪揆予郊島輩着君季  
孟間江柳未遽折園花且同攀後夜短亭夢漫寄東風還

### 天王禪寺

在新城遐觀橋東宋淳熙間建明自洪武景泰中皆增修之壯麗稱江左巨剎嘉靖時倭寇燬之香聞數十里火三月不滅

鑿按志載寺有吳道子畫觀音像曾爲盜竊渡江病作夢大士斥之盜懼復送還寺

### 五百羅漢院

在州南焦里村宋時建一名華龍寺

宋秦觀爲五百羅漢圖記曰五百羅漢圖一軸入定於龕中者一人蔭樹趺坐而說法者一人左右侍聽者八人說

### 廣陵覽古卷三

### 二十三

經者六人課經者六人課已而收經與誦而倚杖者各一人環坐指畫而議論者塵揮手杖支頤相嚮而談者各六人歸依寶塔者五人和南合坐者六人稽首舍利光者八人飯餓鬼者四人食烏鳶者施魚鼈者各五人雲升者六人指現五色光者鉢現白光者泉湧於頂者火燃於踵者袒而洗耳金環手隨求而立者各一人受齋請者七人受龍女珠獻者六人受兩貌花獻者四人受往生花獻者七人受衣冠從三牛謁者五人受胡輸驢者七人受胡從兩橐馳而致琛者四人受海神跪寶者五人騎龍者跨虎者

乘馬者象駕者獅子馭者各三人爲犀說法者一人後座者三人植錫而座巨蟒上者一人背樹矚山鵲者六人注猱升者仰鳳集者閱麋鹿者各四人俛伏獮者翫舞鶴者各五人擷菡萏者一人從後者五人書蕉葉者五人持蕉葉而涉筆者二人焚香而茗飲者六人臨流而滌鉢者三人滌已而持歸者一人浣衣者就樹絞衣者浣已而歸者將浣而進者隔岸而覘者各一人洗屨者後洗而納屨者振衣而去者各一人削髮者爲削髮者沐而待者解衣者既解收衣者各一人補毳者二人操刀尺者一人治綫者

廣陵覽古卷三

二十四

三人泉涌於石遠近而觀者十六人度石梁者三人欲度者四人行杖錫者二人導者二人贊者三人芒屨擔簦而歸者三人束裝而行者一人或坐或行或立跏趺欵欠杖拄笠負數珠白紵山曲水隈塗觀而卒遇者十八輩合一百二十有三人或坐或行或立背樓觀憑欄楯據危迫險俛瞰仰睇直視轉盼側睨旁顧近相目遠相望者二十八輩合一百三十九人凡羅漢五百人而佛處其中焉佛之旁又有寶冠珠絡持如意執蓮花座猊象者菩薩二右袒徒跣曲拳和南而後侍者弟子十瞻贊而前謁者十六甲

胄椎髻挺劍秉鉞立左右者善神二別三十有一焉又童子有抱經室主茶奩荷策持瓶典湯徹器凡十有六鬼有馭龍馭馬象受施食送齋書鱗身鳥味衣短後隱樹而窺者凡十有四雜人物有白衣胡跪獻花香珍怪衣冠而謁驅牛以從載犀象挈筐筐而進被甲服弓矢愕而瞻歎者凡十有九鳥獸有鳳鶴鵲烏龍虎犀象獅子馬牛橐駝蟠蟒戲猊猿獠大小四十有三然以羅漢爲主故號五百羅漢圖世傳吳僧法能之所作也筆畫雖不甚精絕而情韻風趣各有所得其緜密委曲可謂至矣昔戴逵常畫佛像

廣陵覽古卷三

二十五

而自隱於帳中有人有所藏否輒竊聽而隨改之積數年而就余意法能亦當研思若此然後可成非率然而爲之決也余家旣世崇佛氏又嘗覽韓文公畫記愛其善序事該而不煩縟詳而有軌律讀其文恍然如卽其畫心竊慕焉於是做其遺意取羅漢佛之像而記之顧余文之陋豈能使人讀之如卽其畫哉姑致叙之私意云爾元豐二年正月十五日

以上高郵州

陽山

在興化縣西四里楚令尹昭陽食邑於此歿葬其下因以名山

### 孤山

在縣東南七十里以縣境皆水獨此一山最高因名

### 芙蓉鎮

在城東北三十五里元至正十四年董搏霄戍鹽城興化勦大縱得勝兩湖賊巢卽其地築芙蓉砦賊入輒迷故道盡殲之自是不敢復犯卽此地今爲鎮

### 陵亭鎮

## 廣陵覽古卷三

## 二十六

在城南三十五里唐大順元年朱全忠將龐師古略淮南下天長高郵引兵深入與賊將孫儒戰敗於陵亭乃退得勝河

在縣東十里古名率頭湖宋建炎中張榮賈虎孟威鄭握率山東義軍由梁山泊與金人轉戰南下至承楚間榮以舟師設伏揜擊金將於率頭湖大敗其衆因更名得勝湖大觀圖經又載湖心有潭白龍居之

### 平望湖

在縣北二里因湖四方平行故名

鑾按古志云中有古墓有人於湖中得一劍屈之首尾相就識者曰此繞指柔也

### 南溪

在縣南半里許宋范仲淹築滄浪亭於此有南溪馴鶴詩  
蓮花六十四蕩

在縣東南半里許自蘆洲接得勝湖紅蓮彌望浩無涯  
極一縣奇觀後被洪水所損

### 旗干蕩

在縣東十三里蘆洲之南宋岳飛駐師於此

### 捍海堰

卽范公堤在縣東一百二十里與泰州相接唐黜陟使李承創築宋開寶中知泰州王文祐增修後圯天聖中范仲淹監西溪鹽倉議更築發運副使張綸上其事且自請知泰州以仲淹令興化董修築之役越三年堰成障蔽潮汐民得安居農事鹽課兩受其利因稱爲范公堤淳熙初待制張子正加修元興化令詹士龍復請發九郡人夫大加修築自通州呂四場迄於鹽城廟灣場亘三百餘里先是得仲淹石記上鐫遇詹再修至是乃驗明成化中又修我

朝疊沛

皇恩軫念蒼黎發帑修築永慶安瀾矣

濯纓亭 滄浪亭

俱在舊稅務前宋天聖間知縣范仲淹建

宋范仲淹詩素心愛雲水此日東南行笑解塵纓處滄浪  
無限情 滄浪清可愛白鳥檻中飛不見遊京洛風塵戀  
客衣

文會堂

在南津里范仲淹建一時學者雲集如滕子京查道許元

廣陵覽古卷三

二十八

周孟陽諸賢皆遊於此

鑾按泰州亦有文會堂則滕子京所建而文正嘗唱和有  
詩

仲二舍人宅

在縣西北十五里仲家河名勝志云仲氏兩舍人世掌絲  
綸縣北界鳳凰河因之得名

鑾按舊志云仲氏死於亂軍宋太祖以銀裝首葬之爲疑  
冢十餘處今縣治長安鄉墓址尙存

昭陽廟

在縣治西陽山祀春秋時楚將昭陽一名山子廟

鑾按昭陽楚昭奚恤之後也戰襄陵有功裂海濱地爲食邑歿而葬於城西之高阜後人遂以陽山名之而並立廟焉

三閭大夫廟

在縣治東祀楚屈原年代無攷

蘇秦廟

舊在橫塘涇年代無攷

東廣福教寺

廣陵覽古卷三

二十九

在縣東北唐元和間建

鑾按志載明嘉靖間寺火佛腹中有紅紙凌烟而出則建寺時塑像疏也殿脊上有小鐵塔相傳吳越王錢宏俶所造

木塔寺

在縣東鄉六十里唐長慶間建寺有古梅人以其花之盛衰占歲豐歉

西寶嚴教寺

在縣西迎恩里碑目云興化舊縣治寶嚴院中塔基甃石

俱有鐫刻爲唐大順九年物寺尙存

開元觀

在縣治大街來范里卽華陽洞天別業唐大歷間建元至正中兵解其殿之左柱有血流出又水火二神現示殿脊乃止

蓮花雙塚

在安仁鄉年代失攷

鑿按舊志云舊傳有姑嫂共刈稻姑墮深溝中嫂急拯之俱溺死葬於溝側築二邱焉墓上忽各生蓮花里人驚異

廣陵覽古卷三

三十

啟棺視之花皆從口出人稱蓮花塚

以上興化縣

廣陵覽古卷三終

男朝生校字